

AKASHVANI AIZAWL

HEADLINES (EVENING)

- Chief Minister Pu Lalduhoma Dampa bialtu MLA Pu Lalrintluanga Sailo thi chu Mizoram Legislative Assembly in debator tha a chan a ni a ti a
- Kawnpui leh Sairang inkar kawng chhia avanga an lirthei din tir mek Mizoram Oil Tanker Driver’s Association (MOTDA) te chuan an lirthei an la din tir chhunzawm zel.
- Parliament rorel inkhawm chu a ni thum nan Opposition ten rorel mumal thei lova an siam avangin vawiin atan tihtawp a ni.
- Prime Minister Narendra Modia chuan vawiin khan ram pahnih United Kingdom leh Maldives tlawh turin a zinchhuak.



MLA LALRINTLUANGA SAILO LAID TO REST

Chief Minister Pu Lalduhoma Dampa bialtu MLA Pu Lalrintluanga Sailo Mizoram Legislative Assembly in debator tha a chan a ni a ti a

Dampa bialtu MLA Pu Lalrintluanga Sailo chu vawiin khan a chenna in, Aizawl Luangmual vengah vui a ni a, sorkar hruaitu pawimawh hrang hrang bakah mipui tam tak pungkhawmin amah thlahna hun hi hman a ni.

Pu Lalrintluanga Sailo vuinaah hian ZPM Legislature Party aiawh leh House Leader a nihnain Chief Minister Pu Lalduhoma chuan thu sawiin Mizoram Legislative Assembly in debator tha a chan a ni a ti a. Remna avanga hnam sipai lo haw PAMRA te zinga tun dinhmuna Legislators awmchhun a nih thu a sawi a. Assembly session-a a hun hnahnung leh a thusawi hnahnung a thlir nawn lehin lawmthu sawinaa a khar thu a sawi a, A kalsan tak a chhungte a tawrhpuithu leh a thawhpui MNF Party leh a bial mipuite a tawrhpuithu a sawi a ni.

Leader of Opposition Pu Lalchhandama Ralte, MNF Legislature Party Leader pawhin thu sawiin Pu Lalrintluanga Sailo ruang chungathusawi a ngai ta mai chu a rilru a nat thu a sawi a. Pu Lalrintluanga Sailo chu an thawhpui mi zahder thiam, a tul huna hmatawnga tang thin, a tul huna midangte dawm kang tlat thin a a ni a ti a. Mithiam, tunlai khawvel thang leh hmasawn tak mila inbuatsaih zel thei a nih thu a sawi a, ram rorelna inah pawh a thawh tam hle a ni a ti.

Deputy Speaker Pu Lalfamkima pawhin thu sawiin Pu Lalrintluanga Sailo nen hun reilote ram rawngbawl hna an thawhho hnuin pa tha tak, rilru zau, mi khawngaih thei leh mite tanpui thin a nih thu a sawi a. Assembly session la hman zel turah pawh a hmun ruak a zau dawn hle tih a sawi a ni.

MNF Party President, Chief Minister hlui Pu Zoramthanga pawhin thu sawiin Pu Lalrintluanga Sailo vuina hun hman a ni ta mai chu mumang emaw tih mai tur a nih thu a sawi a. Hun rei tak atangin a hriselna a tlahniam tih sawiin hetihreal hian mi chhel tak, a theih loh tura ngaih pawh a duty leh a zinna tura ruat te ti hlawhtling zel mi leh party tana mi rinawm, entawntlak leh party member te fuihna atan pawha a hman thin a nih thu a sawi a ni.

<><><>

GOVERNOR

Vawiin khan Meteorological Centre Aizawl Director & Head Pu Sudheer Kumar Dwivedi chuan Larsap General (Rtd) Vijay Kumar Singh chu Raj Bhavan-ah hmuin an hmalakna leh hmachhawpte a sawipui.

Larsap chuan Meteorological Centre Aizawlin kumin July ni 27-a kum hnihna hmel a hmu mai tur chu lawmawm a tih thu sawiin, Director & Head Pu Sudheer Kumar Dwivedi leh a thawhpuite duhsakna a hlan a. Khaw awm dan tur hrilhlawkna leh data pawimawh tak tak siam kawnga an hmalaknate fakawm a tih thu sawiin, hmalaknate tun aia zau zawka tihlara put darh zung zung a nih theih nan line department leh media-te zau zawka thawhpui tur leh Mizo mipuite'n tangkai taka an chhawr theih nan Mizo tawng ngeia tarlan tum turin a chah a. Mizorama radar bun thuai a nih theih nana hma la rang turin a chah nghal bawk.

He hunah hian Pu Sudheer Kumar Dwivedi chuan Meteorological Centre Aizawl tihchangtlun kawnga Larsap hmalakna leh thlawpna an dawn thin avangin lawmthu a sawi a. Meteorological Centre Aizawl hmalakna hrang hrang tarlan zingah hian VVIP lo zin apianga an kalna tur hmuna khaw awm dan tur hrilhlawkna siam bakah ni 7 chhung atan zela Mizorama khaw awm dan tur hrilhlawkna siamte, tourist hip nana Aizawl Air Quality Index siam bakah Mizorama khualzinte kal tamna hmun 4 thlan chhuaha khaw awm dan tur hrilhlawkna (Tourist Places Forecast) siamte leh darkar 6 kalta zela khaw awm dan kimchang, social media leh website kaltlanga tarlante a tel a.

Hmachhawp an neih tarlan zingah hian kumin chhung ngeia Mission Mausam hnuaia Doppler Weather Radar, Laipuitlang, Aizawla bunte, Mizorama cyclone tleh thin zinga za zela 90 te chu chhim lam atanga lo thawk a nih avangin Meteorological Office, Siahaa bunte a tel a ni.

<><><>

MOTDA

Kawnpui leh Sairang inkar kawng chhia avanga an lirthei din tir mek Mizoram Oil Tanker Driver’s Association (MOTDA) te chuan an lirthei an la din tir chhunzawm zel.

Akashvani zawhna chhangin MOTDA President Pu Romel Lalruatdika chuan kawng thuam tha turin Mizoram sorkarin hma a la tan ni a an hriat thu leh NHIDCL lam pawhin kawng siamna lung te an chhekkhawl tana an hriat thu a sawi a. Hetihrial hian a hmun ngeiah naktuk emaw a tuk lehah emaw hnathawh hi an enfiah dawn a ti a. Hemi hnuah hian kawng thawm that a nih dan te thlir chungin an kal zel dan tur chu an la ngaihtuah leh dawn a ti.

Pu Romel Lalruatdika chuan a tir atanga an tum angin kawng laka tangkhang tuialhthei rawn phur sa tawh truck te chu dan an tum loh thu leh kawnga tang tlem azawngin tuialhthei an lo phurh luh thu a sawi a. Tun dinhmunah petrol pump nghei hmak tawh chu tlem azawng awm mahse heng lirthei lut tlem azawng leh stock lo neih avanga coupon chauha lak theih nei te leh petrol leh diesel lak tur la nei erawh tlem azawng an awm thu an sawi a ni.

Sorkar, Food Civil Supplies & Consumer Affairs Dept chuan National Highway 6/306 that tawh loh avanga bungraw phur lirtheite'n harsatna an tawh mek leh pawl thenkhatte'n nawrh an huaihawt chungchangah nitin mamawhah harsatna mipuite'n an tawh loh nan Sawrkar chuan theihtawp a chhuah reng tih vawiin khan thuchhuah siamin a sawi a.

Supply Department chuan Furpui intan hmain ngawrh takin monsoon stocking a kalpui avangin buhfai sem kawngah harsatna a awm lo a ti a, tuialhthei pawh Supply Department-in report a dawn danin tun dinhmunah AMC area bikah stock tlema zawng a awm mek a. District dangah pawh District Administration-te hriatpuina hnuaiah stock vil chhunzawm reng a ni.

Hetiang a nih lai hian mipuite pawh mamawh ve dangte hre reng chung a oil mamawh lam khawm kawngah huamhauh fal awmlo turin Department chuan a ngen a. Mipuite'n harsatna an tawh loh nan Sorkarin theihtawp a chhuah mek zel a ni.



BROADCASTING DAY

Vawiin khan National Broadcasting Day hman a ni. 1927 vawiin angah hian ramchhunga a hmasa ber atan Bombay Station atangin Indian Broadcasting Company hnuaiah radio broadcast tan a ni a. Kum 1936 June ni 8 ah Indian State Broadcasting Service chu All India Radio (AIR) tia hming thlak a ni a, Akashvani tia thlak chhunzawm a ni.

National Broadcasting Day puala a thuchahah Akashvani Director General, Dr.Pragyapgaur chuan Akashvani ngaithlatu zawng zawngte chibai bukin Akashvani in a tum ber - mipuite hrilhhriat, zirtir leh rimawi hmanga awm tlei kawngah hmalak chhunzawm zel a nih tur thu a sawi.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

PARLIAMENT

Parliament rorel inkhawm chu a ni thum nan Opposition ten rorel mumal thei lova an siam avangin vawiin atan tihtawp a ni. Vawiin thutkhawmah hian Opposition te chuan Bihar Special Intensive Revision of electoral roll leh thildang sawiho ngiatin house chhungah nasa takin an au buai a.

Lok Sabha leh Rajya Sabha ah hian vawiin tum hnih rorel inkhawm tihtawp anih hnuah vawiin atan inkhawm tihtawp chhunzawm a ni ta a ni.

<><><>

PM

Prime Minister Narendra Modia chuan vawiin khan ram pahnih United Kingdom leh Maldives tlawh turin a zinchhuak. A thawhkhatnaah UK ah hun a hmang ang a, hetah hian UK PM Keir Starmer nen an inkawm ang a. King Charles III na an inkawm bawk ang. Prime Minister Stermer nen hian ram pahnih inkara thawhdunna hrang hrang an sawidun ang a. Free Trade Agreement FTA chuangchang an sawi bawk ang.

Prime Minister Modi leh UK PM Keir Starmer te hi tum hnih an lo inkawm tawh a. Kum 2024 November thla khan G20 Summit Brazil leh kum 2025 June thlaa G7 Summit ahte an lo inkawm tawh a ni.

<><><>

PM MANN KI BAAT

Prime Minister Narendra Modi chuan Pathianni chawhma dar 11 hian 'Mann Ki Baat' programme-ah ram chhung leh ram pawn mipuite hnenah thu a sawi leh dawn a, Tun tum ami hi a tum 123-na tur a ni ang.

He programme hi Akashvani leh Doordarshan network pumpui, AIR News website leh Newsonair mobile app-ah te tihchhuah a ni ang a, AIR News, DD News, PMO, leh Information and Broadcasting Ministry-a YouTube channel-ah live-stream a ni bawk ang.

<><><>